

HEADLINES :-

1. Thingtlanga chhungkaw harsa zawk te chhawmdawlina kawnga hma la turin, Rural Development & Administration Department leh Bharat Rural Livelihood Foundation chuan kum 3 chhung atan thawhhona thuthlung an ziaik.
2. BJP Mizoram chuan "OPERATION SINDOOR" ral hmatawnga awm India Sipai, Mizo tlangval huaisen te zahna leh an thlawpna lantir nan naktuk hian Aizawlah kawngzawh huaihawt an tum .
3. Operation Sindoor beihpui thlak anih hnuah Prime Minister Narendra Modia chuan vawiin khan Punjab-a Adampur Air base a tlawh.
4. Prime Minister Narendra Modia chuan firfiakte do kawngah Operation Sindoor chuan tihdan phung thar a tichhuak tih sawi.

<><><>

RD MOU

Rural Development & Administration Department chuan Mizoram thingtlang khua a chhungkaw harsa zawk te chhawmdawlina kawng-a chak zawka hmalak a nih theih nan, Bharat Rural Livelihood Foundation (BRLF) chu kum 3 chhung atan thawhhona thuthlung “Memorandum of Understanding (MoU)” a ziah pui.

Bharat Rural Livelihood Foundation (BRLF) hian Mizoram chhung-a rural development kaihnawih, Sawrkar scheme leh programme hrang hrangte awmze nei zawk leh hlawk zawka kalpui a nih theih nan State Sawrkar a thawhpui ang a. Natural resource management hnuaia thil chi hrang hrang, tuihna humhalh, ramngaw leh nungcha humhalh bakah, tharchhuah ta, lam-a thingtlang miten hmasawna an neih theihna tur kawngah Department hrang hrangte leh an scheme neih hrang hrangte hmanga thawhho dan tur ruangam a siam ang. Central Schemes hrang hrangte awmze nei zawka kalpui a nih theihnan Rural Development & Administration Department nen an thawk dun dawn a ni.

He thawhhona hnuaiah hian thingtlang loneitute tan tui luang ral tur humhalhte, hlawk zawk a lei hnuai tui sawngbawl theihna tur leh hlotur hmang loa hmalak tur a ni ang a. Loneitute thar chhuahte hlawk zawka kalpui tum a ni bawk. BRLF te hian a tul angin loneitute hnenah training an pe thin bawk ang.

Memorandum of Understanding (MoU) hi Rural Development & Administration Department Minister Prof Lalnilawma hova ziah a ni a, Rural Development & Administration Department aiawhin Pu V. Lalengmawia Additional Secretary leh Bharat Rural Livelihood Foundation (BRLF) aiawhin Pu Kuldip Singh, CEO ten an hming an ziaik a ni.

<><><>

CBSE

CBSE pawl 10 leh pawl 12 board exam result chu vawiin khan puan a ni a, Mizorama CBSE school hrang hrang te pawh an pass tha thawkhat ni a hriat a ni a, Mizoram CBSE sikul te report kimchang hi nghah mek a ni.

Central Board of Secondary Education chuan vawiin khan pawl 10 leh pawl 12 board exam result a puang a, ram pumah pawl 10 zirlai zaa 93.66 an pass a, pawl 12 zirlai zaa 88.39 an pass a, pawl 10 leh 12-ah te hian hmeichhia an ti tha zawk ve ve a ni.

U-DISE 2023-24 report-in a chhinchhiah danin, Mizoramah CBSE hnuaia school 14 an awm a chungte chu- Jawahar Navodaya Vidyalaya- 8, Kendriya Vidyalaya-4, leh Sainik School pakhat bakah Mizo sorkar enkawl Mizoram Institute of Comprehensive Education, MICE a awm a, heng bakah hian Eklavya Model Residential School 11 a awm bawk a, Akashvani Aizawl-in a zawh kualah Mizorama CBSE school hrang hrang atanga pawl 10 leh pawl 12 board exam te chu an pass tha thawkhat hle a ni.

<><><>

ART EXHIBITION

Information & Public Relation Department leh Mizoram Art Development Society, MADS-in an sponsor painting exhibition ni 5 chhung awh tur chu vawiin khan Aizawl Vanpa Hall-ah neih tan a ni a,

Lemziak chi hrang hrang 40 chu lei theiha pho chhuah a ni a, lemziak te hi thupui chi 3-ah then niin, Bible lam hawi- Biblical, Mizo zia rang lang thei Scenery leh thil dang ten a then hrang a ni. Vawiina lemziak phochhuah tam zawk hi acrylic on canvas deuh vek a ni a, lemziaktu Vanlalzarzova chuan Mizo mipuite chuan lemziak an ngaihlu thiam tawh hle a a hriat thu a sawi a, ngaihlan leh thlir dan dang hmanga thlir thiam te pawh an tam tawh hle a ti a, tun dinhmuna Mizoram sorkarin lemziaktute chawisan na'na hma a lak dan chu lungawithlak a tih thu a sawi bawka a ni.

Lemziaktu Vanlalzarzova hian kum 2021 khan Ministry of Tribal Affairs , I&PR leh MADS tangkawp ina buatsaih Promising Artist Award 2021 a lo dawng tawh a ni.

Exhibition hawngtu, I&PR Secretary Pi Betsy Zothanpari Sailo chuan artist thiam tak tak Mizoramin a neihte theih ang anga chawikan chu an ngaihpawimawh thu sawiin, an kutchhuak mawi tak takte phochhuahna hun buatsaih a ni thei chu lawmawm a ti a; mipuiin an hlut sak ngei a beisei thu a sawi a. Tunlai technology khawvel hmasawn zelin a hrinchhuah Artificial Intelligence hmanga lemziak hrang hrang awlsam taka siamchhuah a nih tak chungchangah I&PR Secretary chuan heng AI hmanga siam tam tak karah hian mi zawng zawngin an siamchhuah ve theih loh mihring kutchhuak nge nge chu a hlut zawk thu a sawi. Exhibition hawnna pual inkhawm hi MADS Vice President Pu Laltanpuia chuan a kaihruai a. I&PR Department officer ten an telpui bawka a ni.

<><><>

MNF

MNF Aizawl East-I Block te chuan, Aizawl East-I huam chhunga awm Hot Mix Plant Zuangtui a mi chu mipui tan a tawrhna thlentu a ni an ti a, dan dik lova Hot Mix Plant khawl hman avanga harsatna thleng chungchang ah, PWD ten an FIR theh luh an hnuhlet loh chuan, Zuangtui a PWD Quality Control, Research and Development Office staff te an office kal tur tiamchin awm lova dan an ni ang, an ti.

MNF Party chuan Hot Mix Plant khawtlang mipui ten an duh loh na an lan tir chungchang ah, Zuangtui khawtlang tawrhna an hrethiam an ti a, Pollution Control board pawhin a awmna hmun a dik loh dan te, khawpui area atanga KM 1 ai a hnai lo leh sakhaw biakna hmun atanga 0.5KM ai a hnai lo ah tih te a nih laiin he Hot Mix Plant hi khawpui chhung ah leh Biakin kawt deuh chiaah ah a awm a, heng bakah hian, he khawlin Pollution chhia a tih chhuah tam loh nana diesel hman tur tih a nih laiin, diesel ai a chhe zawk leh la refined loh crude oil an hmang leh zel an ti a, Chu mi piah lamah a khu leh a rima chhuah tam loh nana a hnuaia tui awm reng tur chu tui dah a ni ngai lova, Zuangtui khawtlang pawhin luikawr tui laksak an inhuam chung pawhin an ngaihsak lo a ni an ti.

PWD in Dan tam tak bawhchhe chunga Zuangtui khawtlang laka FIR an la thehlut ngam chu mak an ti a, kan Home minister pawhin an FIR thehluh te lo register tir lo tur leh Pollution Control Board te dan an bawhchhiat chungchang ah dan anga thubuai lo siamsak zawk turin an ngen tih an sawi a ni.

<><><>

PUC

Pachhunga University College atanga BSc 6th semester zirlai, Neeraj Singh Rawat chu University of Milan, Italy-a Master's program in Environmental Change and Global Sustainability (ECGS) zir turin thlan a ni.

Neeraj Singh Rawat hi Uttarakhand a piang leh seilian a ni a, Common University Entrance Test (CUET) kaltlangtin Pachhunga University-ah BSc Environmental Science a zir a, Akashvani Aizawl zawhna chhangin, Neeraj-a chuan IELTS exam-in University engemaw zatadilna a thehluh zingah University of Milan-in a dilna a pawm chu a lawm hle tih a sawi a. He programme hi Fall session, kumin September thla atangin a zawm dawn tih sawiin, Mizorama zirlaite chu ram pawna zirna sang zawk chhonzawm ve thei turin zirna mai bakah co curricular activities hrang hrangah te tel a, internship ti turin a chah a, a pian leh seilenna Uttarakhand atanga

Mizorama environmental science a zir chuan zirna lamah chauh ni lovin nunphung, leh khawvel a thlir dan te a her rem sak tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

MIZORAM BLIND SOCIETY

Mizoram Blind Society-in an member mitdel thenkhat eizawnna mumal neih loh vanga khawlaia rimawi hmanga zai thinte chu khap lova, hrethiam turin sawrkar leh mipuite an ngen.

Mizoram Blind Society chuan tun hnaia an member, mitdel thenkhat, rimawi nena Aizawl New Market, Dawrpui leh hmun danga zai thinte chungchang social media lama post siam chungchangah thuchhuah an siam a, an member 6- Elvin Zothantluanga (Ainawn Veng), Lalchhandami Renthlei (Zemabawk North), Zodinpuui (Zemabawk Galili Veng), Vanlalfela (Ainawn Veng), Ramthachunga (Ainawn Veng) leh Lalrinchhana (Luangmual West Geology and Mining Complex) te dinhmun chu chiang taka an hriatpui thu sawiin; chhungkuaa eizawnna mumal nei lo leh baihvai ve tak tak an ni a, mit var pangngai te anga hna remchang apiang thawk thei an nih ve loh avangin hetiangaz bazar leh hmun remchanga rimawi hmanga an zainaa mipuite khawngaihna tling khawm hmang hian anmahni leh an chhungkua chawmin harsa takin an khawsa ve tawh tawh a, eizawnna ngialnghet leh rinchhan tlak sawrkarin a pek theih hma chuan an eizawnna hmuh theih ve chhun- ni tina mipuite khawngaihna dila an zai thin chu khap lova, hrethiam hram turin Mizoram sawrkar, tualchhung thuneitute leh Zoram mipuite an ngen a ni.

M.B.S. chuan nikum khan bazarpui leh khawlai hmun danga an member puiten zaina kawnga harsatna an tawh chungchangah, Dawrpui Local Council Chairman te, Persons With Disabilities (PwD) Commissioner leh Aizawl DC-ah te pawh lehkha an lo theh luhsak tawh tih an sawi bawh a ni.

<><><>

OPERATION SINDOOR SOLIDARITY MARCH

BJP Mizoram chuan "OPERATION SINDOOR" ral hmatawnga awm India Sipai, Mizo tlangval huaisen te zahna leh an thlawpna lantir nan naktuk hian Aizawlah kawngzawh huaihawt an tum a,

Pahalgam, Jammu & Kashmir a Pakistan thlawp Firfiak ten pawisawi lo te pawng kahin Nunna hlu tak an chan kha pawl an ti a, Terrorist te support-tu Pakistan chuan an pawikhawih nasa tak avang inan tuar ngei tur a ni tih an dinna a ni tih sawiin BJP Mizoram chuan he indonaah hian Mizo tlangval huaisen engemaw zah ral hmatawngah an awm a, an ram tan zan mu lo leh thih huamin ral an do a, hetihlai hian an thlawpna leh zahna lantir an tum tih an sawo ni.

Naktuk chhun dar 12-ah Aizawl Tresury Square-a War Memorial atanga Vanapa Hall kawt thleng kawng zawh tur ani a Ral hmatawnga awm Mizo tlangval Sipai huaisen chhungte, Ex-Service leh NGO te, Party hrang hrangte leh Mizo mipuite, Party bil awm lova tel turin an sawm tih BJP Mizoram State President Pu Vanlalthmuaka chuan a sawi a ni.

<><><>

PM VISIT AIRBASE

Operation Sindoor beihpui thlak anih hnuah Prime Minister Narendra Modia chuan waviin khan Punjab-a Adampur Air base a tlawh a. Sipai te nen inkawmhona hun tha tak an hmang. PM Modia chuan sipaite chu an huaisennaah fakawm atih thu a sawi a. Social Media-ah an inkawmna chungchang sawiin Pu Modia chuan huaisenna ataka lantirtu, mi tumruh leh hlauhna a ngam loh sipaite nen hun an hmang chu ropui atih thu a sawi a ni. Kan corr report ngaithla ang.

<><><>

PM ADDRESS NATION

Prime Minister Narendra Modia chuan firfiakte do kawngah Operation Sindoor chuan tihdan phung thar a tichhuak tih sawi. Nizana ramchhung mipuite hnena a thusawinaah he thu hi sawiin Pu Modia chuan India sipaiten Operation Sindoor beihpui an thlak chu

a hming ringawtah tawp loin rampum mipuite thinlung sosang leh chhelna puanchhuahna a ni a ti a. Rorelna dik awm tir tura beihpui thlakna a ni tih a sawi.

PM Modia chuan nuclear ralthuam hmanga invauna chu ngaihnam mai an tum lo tih sawiin India laka firfiaka chetna chu na taka chhanlet a ni ang a ti a. An chhanletna pawh ramn a duhdan tak a ni dawn tih a sawi a.

Pu Modia chuan Pakistan-in inkahna titawp turin India a ngen a, mahse Idnia chuan an pawikhawih thin an tih tawp hunah chauh inkahhai hi a remti tih a sawi.

Prime Minister chuan sipaite, intelligence agency-te leh Scientist te chu zahna chibai a buk a. An huaisenna leh inpekna chu ramchhunga hmeichhia zawng zawngte tan a hlan a ni.

Pu Modia chuan Pakistan na tak demin firfiak chetna an chhui chian hnuah Pakistan-a Bahawalpur leh Muridke ah te an chhui tawp zel a ti a. Heng firfiakte hmunhma hi Pakistan chuan a tihchhiat vek a ngai tih sawiin an ti chhe lo anih chuan an tan kawng dang a awm thei tawh lo a ti a. India leh Pakistan te an inbe dawn anih chuan firfiaka chetna chungchang leh Pakistan Occupied Kashmir chungchangah chauh a awm thei ang tih a sawi a. Pu Modia chuan firfiakte laka zahngaihna neihloh tawp chu khawvel tha zawk neih theihna tur anih thu a sawi bawh a ni.

<><><>